

Lisette Does di fundacion Cas Marie:

‘Adapta na y acepta un persona cu demencia’



ORANJESTAD – Bon Dia Aruba a papia cu Lisette Does pa splica mas tocante kico demencia ta. Prome señal di un persona cu demencia, ta cu e ta lubida y no corda kico a pasa un rato pasa. Mayoria biaha un hende cu demencia ta corda locual a pasa 100 aña pasa, pero cos reciente nan ta lubida. Does ta bisa cu nan, di Cas Marie, ta contento ora cu e cliente tin alegria, pasobra despues di par seconde, nan ta lubida e motibo cu a haci nan feliz na prome instante. Awo, esey no kier men cu persona cu lubida, tin demencia.

“Tin biaha, persona ta mucho ocupa of tin hopi cos den mente. Anto locual e tabatin den mente pa haci of bisa no t’ey mas. Pero ta keda purba pa corda. Den e caso ey, no mester ta mucho preocupa, pasobra hende ta asina”, Does ta expresa.

A puntra si dokter mester check ora un persona tin duda, of ta referi na especialista? Does ta splica cu mayoria di biaha e persona ta pidi su dokter di cas pa un verwijsbrief pa Centro

di Memoria. Eynan e persona ta haya henter un check up pa un especialista of psicologo. Tambe un persona di Centro di Memoria lo por pasa e cas pa wak con e situacion ta.

Na Centro di Memoria ta haci un test di sanger, y un scan na cabes pa wak con leu e cerebro ta afecta,

anto asina wak si di berdad ‘por papia di un demencia’ anto di ki tipo. “Segun mi ta compronde cu tin cierto parti di bo cerebro cu ta haci cierto funcion ta daña, tin cu bo ta perde manera di papia, perde movimiento fisico, otro cosnan. E ta depende cua di nan e ta afecta, anto di eynan ta descubri ki demencia e persona tin.”

Nan por diagnostica demencia for di trempan, si unabes e cerebro tin un mancha riba dje. A puntra Does si e ta bin den cualkier edad, of solamente riba 50 aña. E ta contesta cu na Aruba tin caso di 50 aña di edad bay ariba, pero mas cu hoben cu esey, ainda no. E ta bisa cu un persona cu ta drestando den edad ey tampoco ta pensa cu e por tin e, e ta dificil.

Cua ta e miho manera pa un famia por actua ora cu nan ser keru tin demencia? Segun Does, e situacion e ultimo añanan e por mira cu actitud a cambia y famia ta acepta un tiki mas cu nan ser keru tin demencia. E ta agrega cu si famia acepta cu nan mama, tata of casa tin demencia, esaki ta yuda cambia e pensamiento y actitud di e otro-nan.

Tambe awendia e ta bisa cu tin diferente manera pa educa nos mes. Manera riba internet por busca kico demencia of Alzheimer ta, anto e sintoma di esaki. Con un persona ta reacciona, con por anda cu persona cu tin demencia.

“Ta importante pa no discuti cu nan. Purba di haci e persona mas feliz pa e momento ey. Respeta y trata nan manera semper, haci esfuerso pa yuda mantene habilidad, y laga nan haci nan cosnan normal cu ta custuma.” Famia mester siña acepta y adapta nan mes na e persona. Tin cu hinca esey den cabes, unabes hinca esey, asina anto e lo bay bon.

Si un persona no kier check pa miedu, famia tampoco kier obliga te ora cu e persona mes dicidi kico por haci.

Con por convence e persona, mirando cu tempo ta pasando? E ta contesta cu awendia ‘famia por acerca Centro di Memoria anto pidi si por haci un bishita na cas.

E ta expresa cu ta posibel y mas habri si hende papia cla pa haya ayudo. “Na Aruba nos ta warda mucho te ora cu e baca hoga. Asina, man na cabes, ta bin spera di haya ayudo. Mi ta haci mi best pa yuda bo, pero bo mes tin cu yuda bo mes.”

Does a conta di un caso di un pashent cu acepta den su fase prome kico e lo bay confronta cune. El a percura pa haci tur su areglo di debe, cas, informa su famia y tambe den pida papel e ta skirbi pa por corda. E ta bisa cu e persona bibando tranquil cu su demencia. Segun Does, e ehempel aki ta un di e poco na Aruba, mayoria ta yega ora e demencia ta leu caba, anto esey ta relaciona cu famia ta warda mucho largo.

Sinembargo, e ta bisa cu ora persona tambe kita e stress, e ta biba un bida mas tranquil. E ora e demencia ‘no ta haci boroto y afecta asina lihe’. Does tambe a comparti cu tin famia cu ta perde pasenshi, of nan ta spanta pasobra e persona ta reacciona malo, pishi su mes of situacion peligroso.

Pa evita situacion asina ta preferibel pa no warda y haci esfuerso pa hib’e dokter pa control. Ta importante pa famia busca ayudo y ta mas habri den e asunto, wak con por yega constata kico tin.

Ta importante pa ora trata cu hende cu demencia mester ta creativo, mester tin pasenshi, ‘si ta posibel, gaña e persona pa sinti su contento’, esey ta haci cu ta bon p’e y pa e famia ‘un persona tranquil ta menos trabou’. Pa persona cu kier tin mas informacion pa compronde y combersa di demencia, nan ta haci anochi informativo pa asina nan por prepara pa proceso di e malesa.

